

法相學會集刊

第四輯

羅時憲先生紀念專輯

三 錄

- 一、大乘掌中論略疏 羅時憲遺著
- 二、攝大乘論疏 陳文蘭
- 三、現觀莊嚴論的研究 許清華
- 四、大乘經涅槃思想之研究 釋惟寂
- 五、從陳譯攝論觀真諦三藏的思想 李潤生
- 六、唯識宗種子學說研究 陳森田
- 七、對「法稱否定比量分類」的評鑒 高永霄
- 八、壇經之【長沙版】和【金陵版】的對勘研究
- 九、The History of "The Sutra of Hui Neng" in English

Versions Translations

Ko Ping-yip

編者後語

攝大乘論疏

羅時憲述

將解此論，略以六門分別：一、明緣起，二、釋題目，三、辯教體，四、顯宗趣，五、敘弘傳，六、解本文。

一、明緣起

諸有情類，無始以來，由不了知宇宙人生真實道理，愛起僻執，造眾惡業，受種種苦。世尊既得無上正覺，由悲願故，隨機說教，令諸有情，了知宇宙人生實相，永滅諸障，證寂滅樂。能斷金剛般若波羅蜜多經云：「所有諸有情，有情攝所攝，若卵生，若胎生，若濕生，若化生，若有色，若無色，若有想，若無想，若非有想非無想，乃至有情界施設所施設，如是一切，我當皆令於無餘依妙涅槃界而般涅槃」。應知佛教一切經論與起總因，皆如此也。

然諸有情，迷謬已久，根器勝劣，亦復不齊。驟宣大法，彼等聞已，反生怖畏。是以世尊說教所因，雖如上述；而所說次第，依解深密經中所說，則有三時。良由機品不同，時節有異，說者隨宜誘導，使聽法者次第而遊，斯正世尊之大善巧也。言三時者：謂世尊初成正覺已，睹諸有情迷執有我，爲除彼執，故於鹿苑等處，宣說小乘四阿笈摩，（即四阿含經「笈摩」舊音譯爲「舍」。）明苦、集、滅、道四聖諦等迷悟因果，令小根人，漸登聖位。是爲第一時教。彼聞四諦，我執雖除，猶於諸法，執爲實有。世尊復爲除彼法執，次於鷲嶺等處，說大般若波羅蜜多經等，以隱密意，明諸法空，令不定姓聲聞乘人，捨小趣大，兼令大乘菩薩了解空義。是爲第二時教。然有聽者既聞空義，不知世尊說空，原爲破有，便謂諸法性相俱空。由是互執有空，皆迷正理，未契中道。佛爲雙除有空二見，爰於解深密等會中，演說法相唯識等教，以顯了義，解釋諸法性相，普爲一切乘人，令知諸法何故是空，何故非空，如是遠離有、空二邊，正處中道。是爲第三時教。

世尊所說一切經教，隨其所應，皆是此三時教所攝。

迨佛滅後六七百年，大小乘教雖並流通，然印度人急求解脫，多習小乘，從而執箸諸法實有。有大論師，名曰龍猛，佛滅後六七百年間，在南印度出興於世，依大般若波羅蜜多經等遣相空教，廣造中觀、十二門等論，對破有執，究暢真宗。同時即有聖提婆等諸大論師，造百論等，助其弘化。由此大乘無相教義，盛行於世。諸有情等，依之修學，獲證者多。及其末流，不知世尊說空密意，復箸空見，便謂諸法一切都無，於所修行任情放捨。至佛滅後九百年時，北印度境犍陀羅國，有大論師出興於世，名爲無著，位登初地，證法光定，於中印度，大弘佛法，親承慈尊所說瑜伽師地等五部大論，述而傳之，復依解深密等了義契經，廣造諸論，破除有、空二執，具明諸法性相，令諸有情，起中道行。此論即是無著所造諸論之一，所以解釋大乘阿毘達磨經中之攝大乘品，抉擇唯識要義，作修學之指南也。

二、釋題目

「乘」者義爲運載，取譬得名，佛法中之教、理、行、果，皆有運載之用，故喻爲乘。所以者何？三藏聖教，能度有情出生死海，到涅槃岸，有津運用，故教名乘。三學六度，乘真如理，能有所往，故理名乘。種種德行，能載有情達於果岸，故行名乘。菩提涅槃是自運果；既得此果，復能載他；故果名乘。

復言「大」者，弘廣之義，對小立稱。小乘之人，悲願智慧並皆羸劣，急求自度，濟他力微。大乘反是，教、理、行、果皆極弘廣，非彼小乘所能比擬，故名「大乘」。龍猛論師造十二門論卷一，以六義釋大乘：一、超出二乘故。二、佛最大，此乘能至故。三、佛之所乘故。四、能滅大苦，與大利故。五、觀世音等諸大士所乘故。六、能盡一切諸法邊底故。慈氏菩薩所說瑜伽師地論卷四十八，及無著論師所造顯揚聖教論卷八，並謂菩薩乘與七大性相應，故名大乘。七大性者：一、法太性，謂菩薩藏教法大故。二、發心大性，發無上正等覺心故。三、勝解大性，謂於前所說法大性教法，生勝信解故。四、勝意樂大性，證入清淨殊勝意欲故。五、資糧大性，謂成就福德、智慧二種資糧，能證無上正等覺故。六、時大性，謂經三無數大

劫，方證無上正等覺故。七、圓證大性，即無上正等覺。又師子覺論師釋阿毘達磨集論，謂七義相應，故名爲大。所舉七義與瑜伽、顯揚二論略有出入，而更爲明了易解。其卷十一云：一、境大，謂以無量教法爲境界故。二、行大，行二利故。三、智大，了二空故。四、精進大，三無數劫修難行行故。五、善巧大，不住生死與涅槃故。六、證得大，得百四十不共法故。（瑜伽論卷三十八云：百四十不共法者：謂三十二大丈夫相，八十隨好，四一切種清淨，十力，四無所畏，三念住，三不護，大悲，無忘失法，永害習氣，一切種妙智。）七、業大，窮生死際作佛事故。若配六離合釋，（學人如未略曉六離合釋，此處可略去。）則如約教言，大乘三藏，文義弘富，故名爲大；有津運用，故號爲乘；大即是乘，持業釋也，如約理言，謂真如理爲衆德所依，第一殊勝；又真如理，體性周徧；勝故徧故，目之爲大。六度萬行，乘此真如，能有所往，故名爲乘。乘此大故，以大乘爲所乘故，有財釋也。如約行言，六度萬行，體用弘廣，目之爲大；有運載用，故名爲乘。即大是乘，持業釋也。如約果言，謂佛所有菩提，涅槃，體性業用，殊勝周徧，名之爲大；自他兼運，目之爲乘。即大是乘，持業釋也。

「攝」者持也，有引持、收持二義。大乘正法，甚深微妙，此能引持；又大乘法，無量無邊，此能收持；名「攝大乘」。「大乘」之「攝」，依主釋也。或以「大乘」爲所「攝」故，有財釋也。

「論」者議論。假興問答，研究法義，以教學人，故名爲論。若以「攝大乘」爲阿毘達磨經中品名，則此論是「攝大乘」之論，依主釋也。若以「攝大乘」爲此論之名，不作彼經中品名解，則依主、持業二釋皆可。

三、辯教體

此能詮論教，以何爲體性？依窺基大師阿毘達磨雜集論述記卷一，辯教體者，略有二種：一、依中觀宗清辨論師等言，勝義諦中，一切皆空，教無所教，體亦非體。是即無體論也。世俗諦中，亦可說以聲爲教體；一切經教論教，皆以音韻曲折所成名句章論爲體性故。二、依瑜伽宗，若淺言之，教體有二：謂文及

義。文是能詮，義爲所詮；文是所依，義爲能依。若深言之，此文與義亦是假有。文義既是假有，復以何法爲體性耶？此有二說：一、如來不說法說。二、如來有說法說。主前說者，爲龍軍、無性等論師。其意即取聞法者識所變假音名句文義以爲教體。佛實無言，唯有無漏大定、大悲、大智。由佛慈悲本願爲增上緣，令聞法者自意識上，變似聲音文義相貌。此文義相，實依聞者善根力起；就佛本願緣力而言，假名佛說耳。若離聞者之識，佛云何說？佛於諸處說言：「我從成道以來，不說一字，汝亦不聞」，即顯此意。主後說者爲護法、勝子、親光等諸論師。謂聞者本願願聞佛說，以此願力爲緣，感得如來識上變起能詮聲、名、句文及所詮之義相。聞者識心既聞佛說，亦生如是似文義相。即取世尊識上所變無漏文義，而爲教體。其言如來不說法者，第是密意說耳。今從後說。又依後說，若就能詮教，而論出體，總有四種：一、攝相歸性體。相謂相狀。諸有爲法，各有相狀，相狀各別。性謂實性，此相狀各別之諸法。非無真實體性。此真實性，即是真如。若離真如，即便無有一切法相。故一切法，皆是真如之相，體即真如。諸法如波，真如如水；波濤之體既是水故。說無垢稱經云：「一切衆生皆如也。一切法亦如也」。故知教體，即是真如，此即攝相歸性。若依此解，本論以真如爲體。然復當知，此唯依據相不離體義邊而說，非謂相即是體，非有爲法即是真如。何以故？真如是常，諸有爲法，皆無常故；真如純淨，諸有爲法有雜染故；真如真實，諸有爲法唯是假故。尚有種種差別，不能具說，是故諸法，雖不離如，然不得說諸法即如。說無垢稱經中所言，是密意說。二、攝境從識體。識所了知，說名爲境，能知之用，說名爲識。解深密經云：「諸識所緣，唯識所現」。厚嚴經中亦有頌說：「心意識所緣，皆非離自性；故我說一切，唯有識無餘」。此中所言，謂一切境相，皆不離識；一切諸識所親緣者，皆識所現。故諸聖教，若經若論，如依能說能造者言，即以說法者及造論者識心爲體。就聞法者言，則以說法者及造論者識所變聲音文義爲其本質，聞法者識託彼本質，復自變似聲音文義相貌；即以聞法者識爲體。此即攝境從識。然復當知，聲音文句雖山識變，聲音文句唯是所變，識是能變；聲音文句唯是所緣，識通能緣；要聽聲音，讀誦文句，始能生解；故應以聲音文句等爲其教體。三、攝假隨實體。諸有爲法，相對爲言，有假有實。猶如叢林，爲樹所成；二者相對，叢林是假，一一株樹，是其實法。假法

唯依於實法上施設建立，實者與假相較，爲有自性。又如繩爲麻縷所成，繩體唯於衆麻縷上假施設有，實無自性。故繩麻相對，繩假麻實。若將麻縷再細分析，則麻復由極微所成；麻體是假，極微爲實。餘應例知。一切假法，皆以所依實法爲體。故諸經論之名句文，唯是假法，若離聲音曲折，則無自體。故一切教，以聲爲體。四、性用別論體。性者體性，即前第三門之實法，假者謂聲。用者作用，即前第三門之假法，謂名、句、文；法體雖假，非無用故。前第三門，攝假從實，名等作用假故不說，唯說實法。今第四門，假實兼取，故復更立性用別論；取說法者識上所現聲、名、句、文，以爲教體。名、句、文三，雖無別體，然假與實，義用各殊，不得謂名等即是聲；於五蘊中，聲是色蘊，名等行蘊；十二處中，聲即聲處，名等法處；十八界中，聲即聲界，名等法界；各別攝故。是如四體，約義用分，和望不同，真俗兼顧；雖說一體，義不違三；諸法各有此四體故。

若就所詮義，而論出體，則以大乘境，行及果，爲其體性。

四、顯宗趣

大乘宗趣，各有二種：一、中觀宗趣。謂清辯等，依般若經，及聖龍猛所造諸論，說一切法，依勝義諦，性相皆空。由性空無故，絕諸對待。山絕對待，故不可說爲空爲有。依世俗諦，有爲、無爲諸法皆有。是爲俗有真空宗。俗有者，如眼有翳，見空中華。真空者，如患翳人所見空華，實無體性。若了真諦，如眼翳除，空華即滅。此爲中觀宗趣，雖亦大乘，然此論所宗，與彼不同。二、瑜伽宗趣。謂世親等，依解深密等經，及慈氏、無着所造諸論，說依世俗諦理，偏計所執實我、實法，一切皆空；從緣所生諸有爲法，及諸法實性之真如是有。依勝義諦，一切法體，不可言說，非空非有。是故依世俗諦，寄言詮故，有空亦有有；依勝義諦，心言絕故，非空亦非有。瑜伽宗一本十支論皆以說明非空非有中道之義，以爲宗也。然此唯是一本十支共通宗趣，此論特殊宗趣復如何耶？曰：世尊第三時教，普爲一切乘人而說，非專爲彼大乘人說。而唯識理，高深精妙，非小根人所能曉了；故第三時教，雖以顯了相解釋諸法，而非處處專說唯識，時有方便。

之談間錯其間。其後慈氏，說論開宗，廣辯諸法性相，固以唯識爲其指歸，然非專談唯識。無箸論師抉擇瑜伽師地論中唯識要義，詮阿毘達磨經中攝大乘一品，以爲此論。自有此論，始有專談唯識之書。其後世親論師，更造二十唯識論及唯識三十頌；十、十八界等一切法相，以慈氏之辨中邊論及無箸之集論爲其要籍。二、唯識門，專談唯識，以識攝一切法相，其要籍則此論及二十唯識等是。故此論以唯識爲宗也。法相唯識之非一門，近人歐陽漸居士，論之甚詳。其講此論大意有云：「唯識、法相分立二宗，何所據而云然耶？」答：論二：「若有欲造大乘法釋，各有三相應造其釋：一者，由說緣起。二者，從緣所生法相。三者，由說語義」。由第一相，本宗建立唯識宗。由第二相，本宗建立法相宗。由第三相，唯識法相之所詮表。二宗分塗，以此文爲據。又其叙百法明門論及五蘊論云：「相宗六經十一論。六經者：深密、楞伽、阿毘達磨、華嚴、密嚴、莊嚴也。十一論者：一本十支是也。約緣起理建立唯識宗，以根本攝後得，以唯有識爲觀心，以四尋思爲入道。約緣生理建立法相宗，以後得攝根本，以如幻有詮教相，以六善巧爲入道。瑜伽十七地攝二門盡，建立以爲一本。抉擇於攝論，根據於分別瑜伽，張大於二十唯識三十唯識，而胚胎於百法明門，是爲唯識宗；建立以爲五支，抉擇於集論，根據於辨中邊，張大於雜集，雜集者，糅集論爲一論，不別立集論支也。——而亦胚胎於五蘊，是爲法相宗；；建立以爲三支。無箸授天親攝論，師子覺集論，皆以瑜伽法門詮對法大義，是爲古學。無箸括瑜伽五分而別出己意以顯揚聖教，則顯揚者，一略本瑜伽也；括本事菩薩地，而別出己意以莊嚴大乘，則莊嚴者，又一地持善戒也；是爲今學；建立以爲二支。一本十支，攝相宗盡。」其敘此論亦云：「無箸括瑜伽師地論法門，詮阿毘達磨經宗要，開法相，唯識二大宗，曰集論、攝論。集論括詮經論全體，攝論則抉擇而括詮之。括瑜伽本地分中菩薩地之功德品故，此境、行、果三事，彼深密經七義故，詮阿毘達磨經中攝大乘一品故。集論法宗法相，則以蘊、處、界三科等敘一切法故；識雖尊特，與色、受、想、行並開蘊故。攝論宗唯識，則以一切法唯有識以立言，所謂一切顯現虛妄分別唯識爲性故，攝三性以歸一識故。然十地經說三界唯心。是則唯言爲獨，於聖教海中有所抉擇而示尊崇，則不在集論而在攝論。復次，集論宗法相，導小以歸大，五姓齊被，三根普攝。攝論宗唯識，詮大而簡小，姓唯被二，乘亦

攝一。然深密經說，一切聲聞獨覺皆共此一妙清淨道，皆同此一究竟清淨，更無第二；法華經說，惟有一乘法，無二亦無三；大論釋論說，二乘及無性亦依大教，各於自乘斷種伏纏，修善離趣。是則種雖有五，教唯一，於聖教海中教機相應獨加持大而說法要，則不在集論而在攝論。復次，集論談中道，依世出世後得智，說六善巧。攝論談中道，依出世智說無所得，無所得者，正智緣如，離能所取，無彼戲論，非無相見，是名中道。然十地經說不動地無相無功用，佛經經說證人如來清淨法海無別所依智無差別智無量智無增減。是則依出世智而得轉依，於聖教海中，由加行以入十地而證佛地，則不在集論，而在攝論」。歐陽所說，可謂詳明。自唐以來，無有如此說者。今按瑜伽宗中所說義理，確有此二門，故特詳引，以資參考。惟復應知，歐陽文中所謂相宗，即瑜伽宗，乃宗派之宗，爲佛教史上所有者。若彼所云之法相宗及唯識宗，其義則取所尊所主，乃義理上所主二門，非教史有二派也。

五、敘弘傳

無著論師既造此論，其弟世親，爲這作釋。復有無性論師，亦釋此論。卷帙最富，頗事引申。中土所傳，唯此二釋。譯斯本論凡有四本：一、後魏佛陀扇多譯，二、陳真諦譯。三、隋達摩笈多譯。四、唐玄奘譯。陳澤多異，餘三異同。世親釋論亦有三譯：惟魏譯缺，餘二同前。此釋譯文，亦陳譯異，隋唐略同。無性釋論，惟玄奘譯。中土疏釋有唐窺基大師論抄若干卷，今已不存。五代以後，特尚禪宗，餘則天台、華嚴兩宗，尚多講習。瑜伽宗義，世罕得聞。此論玄奧，弘者更少。清朝末葉，有大居士名楊仁山，本宗華嚴，旁及諸宗，現今流行單行經論，多其所刻。居士晚年，特崇唯識。其弟子歐陽漸，博大精深，弘瑜伽義，甚倡此論。由是此論復重於世。今人疏此論者，有持松法師，以華嚴宗立場，作此論義記。諸研學者，鮮用爲依。歐陽漸弟子王恩洋，亦著論疏，頗行於世。

〔中間缺〕

如是所知依，說阿賴耶識為性，阿陀那識為性，心為性，阿賴耶為性，根本識為性，窮生死蘊為性等。由此異門，阿賴耶識成大王路。

此是第六結阿賴耶成大王路。

如是所知依，在大乘經論中說以阿賴耶識為體性，乃至化地部中說以窮生死蘊為體性等，皆是一實之異名也。「等」者，等上座及一說部亦說此名有分識也。此中「分」是因義，「有」謂三有：此識為三有因，故名有分識也。由如是等大小二乘諸部聖教種種異門為定量故，阿賴耶識成大王路。「大王路」者，謂世間大王出行所經之路，寬廣平正，衆所共由；以喻阿賴耶識之存在，乃大小乘所必須許，但其名稱異有不同也。

復有一類，謂心意識義一文異。是義不成。意、識兩義差別可得，當知心義亦應有異。
復有一類，謂薄伽梵所說衆生愛阿賴耶，乃至廣說，此中五取蘊，說名阿賴耶。有餘復謂貪俱樂受名阿賴耶。此等諸師，由教及證，愚阿賴耶，故作此執。
如是安立阿賴耶名，隨聲聞乘安立道理，亦不相應，若不愚者。取阿賴耶識安立彼說阿賴耶名，如是安立則為最勝。云何最勝？若五取蘊名阿賴耶，生惡趣中一向苦處，最可厭逆，衆生一向不起愛樂，於中執藏，不應道理；以彼常求速捨離故。若貪俱樂受名阿賴耶，第四靜慮以上無有，具彼有情常有厭逆，於中執藏，不應道理。若薩迦耶見名阿賴耶，於此正法中信解無我者，恒有厭逆，於中執藏，亦不應理。阿賴耶識內我性攝，雖生惡趣一向苦處，求離苦蘊，然彼恒於我愛隨縛，未嘗求離。雖生第四靜慮以上，於貪俱樂恒有厭逆，阿賴耶識我受隨縛。雖於此正法信解無我者厭逆我見，然於藏識我愛隨縛。是故安立阿賴耶識名阿賴耶，成就最勝。

此即第七遮疑難也。

復有一類不信有阿賴耶識者，雖聞如上成立阿賴耶識道理，復作異解：謂心、意、識三者，文雖不同，所詮之義則一。論破之云：「是義不成」。所以者何？眼等六識無間過去，能與意識作生依止，是名爲意，了別境界，說名爲識；意與識之能詮名及所詮義，皆有差別可得；今心與意識，名既不同，其義亦應有異。（此就不認有染污者破。）或染污意別有體性，異前六識，如前已說；意識二義即有差別，當知心義，亦應有別。（此就由前所說道理而認有染污意者破也。）

復有一類不信有阿賴耶識者，謂薄伽梵所說「愛阿賴耶」等四種者，此中「阿賴耶」即「五取蘊」。「乃於廣說」者：謂乃至廣說餘樂、欣喜等三阿賴耶也。「五取蘊」者：有漏五蘊之異名。所以名取蘊者，小乘有部與大乘瑜伽宗所釋有殊。依俱捨論一所述有宗義謂：「煩惱名取，蘊從取生，故名取蘊；如草糖火。或蘊屬取，故名取蘊；如帝王臣。或蘊生取；故名取蘊；如花果樹。」集論一述瑜伽宗之解釋則云：「何等爲取？謂諸蘊中所有欲貪。」又云：「與取合故，名爲取蘊（案謂有漏五蘊常與欲貪相結合，故名取蘊也。）」然二宗釋「取」字義雖不同，要皆指有漏五蘊也。彼等說「五取蘊名阿賴耶」者：謂諸衆生，執五取蘊以爲自我，由是愛之，樂之，欣之，烹之；愛阿賴耶等即愛五取蘊等；故阿耶即五取蘊也。

「貪俱樂受。名阿賴耶」者：依無性釋，此有二解：一、貪與樂受俱行，總名貪俱樂受。即此俱行之貪、樂，名阿賴耶。二、貪與樂受各別名阿賴耶；由貪與樂，箸處異故。詳此見最不應理：貪俱樂受爲能箸，阿賴耶爲所箸（以是所愛，所樂，所欣，所烹故）執能箸爲所箸，於理豈通？

「謂薩迦耶見名阿賴耶」者：此師因見有薩迦耶見執彼阿賴耶爲我體，始有愛阿賴耶乃至烹阿賴耶等事，若無此見，即無彼事，故執彼見即阿賴耶。此師亦是執能箸爲所，於所愛乃至所烹之阿賴耶是有是無，抑是何物，實未能言之也。此類孰能爲所者，可以譬喻明之：如云某甲愛一女人，今有人問此女人爲誰，答云由有愛欲故有愛女人事，故此女人即是愛欲，豈有聞而不笑者乎！

「此等諸師由教及證愚阿賴耶」者：謂上述三師由依不了義教，及證解謬誤故，於佛密意所說阿賴耶識，不能曉了。「愚」無知也。「如是安立阿賴耶名，隨聲聞安立道理亦不相應」者：謂上所述二種異解，於大

乘教固不成立，於其小乘有部等宗所說道理亦不相應。「若不愚者，取阿賴耶識安立彼說阿賴耶名，如是安立則爲最勝」者：「不愚」，謂於阿賴耶不迷謬也；是即於大乘教能通達者。此「不愚者」取大乘教中所說「阿賴耶識」安立於彼增一阿笈摩所說「阿賴耶」名上；如此安立，則無過失，有勝功德。爲欲顯彼異見所有過失，故先問言：「云何最勝」。次復一一別顯其過。

「若五取蘊名阿賴耶」者：叙第一師所有異見。「生惡趣中」以下，破共計執。世親、無性二釋皆云餓鬼，傍生及那落迦名爲惡趣。「一向苦處」者：世親釋云：「謂一向受非愛（案謂不可愛）業果處。於彼有時樂愛生（案謂生彼處生有時亦有樂受生起）者，是等流果；生彼所受異熟果者，唯是其苦（案瑜伽論三十八云：「諸不善業，於諸惡趣受異熟果；善不漏法，於諸善趣受異熟果：是名異熟果。」）習不善故，樂住不善，不善法增；修習善故，樂住善法，善法增長；或似先業，後果隨轉：是名等流果。」「最可厭逆」者：謂生彼惡趣衆生，於一切謂生彼惡趣中衆生，對其五取蘊，最覺可厭，最覺違逆。「衆生一向不起愛樂」者：謂生惡趣衆生，於一切時有多苦故，於五取蘊，曾未發生愛樂。而阿賴耶是攝藏義（以是愛樂等法攝藏故）。「厭逆」，「執藏」，義不相應。故曰：「於中執藏，不應道理。云何義不相應？以彼生惡趣衆生，常求速捨離其苦蘊故。豈有求速捨離而復執藏者耶？」

「若貪俱樂受名阿賴耶」者：叙第二師所有異見。「第四靜慮」以下，破其計執。「第四靜以上無有」者：謂第四靜慮以上諸地無有貪俱樂受；以貪俱樂受唯欲界及色界中初，二，三禪有之，從色界第四靜慮以上，至無色界諸天，唯有捨受，無有樂受與貪俱故。「具彼有情」者：世親釋云：「謂生所得」，即是生於四禪以上諸天，具彼四禪以上果報之有情。「常有厭逆」者：謂厭逆樂受。既厭逆之，必不於彼執持藏護；故曰：「於中執藏，亦不應理。」

「若薩迦耶見名阿賴耶」者：叙第三師所有異見。「於此正法中」以下，破執。「信解無我」者：謂是道（根本無分別智親證無我所顯真如，名曰見道。）之前，加行等位有情，雖未斷我見，未能證無我所顯真如，然於無我道理，已能信解。言「無我」者，謂若人若物，皆由衆緣聚合所生，非有恒常不變之主體也。「恒

有厭逆」者：謂此信解無我者，常極厭逆意識所起薩迦耶見；須斷此見，始證真故。餘例前可知。

既遮異執，次當顯示自宗勝義，故云「阿賴耶識」等。「阿賴耶識內我性攝」者：世親釋云：「謂諸衆生攝取此識爲內我性」。然衆生執之爲我可矣，何必云內我耶？第七染污意向內思量，緣第八識，執以爲我，行相微細；不同意識，但執自所變現有根色身，或執心、心所法爲我，故名內我。阿賴耶識，本非內我，衆生執之以爲內我，故云「內我性攝」。「然彼恒於我愛隨縛未嘗求離」者：謂彼於阿賴識，恒執爲我，爰起愛箸，爲此我見我愛，隨逐纏縛，雖於苦五取蘊希願捨離，然於自我未嘗求離。由是應知，取阿賴耶識安立彼說阿賴耶名，便無第一師所執異見過失。

「雖生第四靜慮以上，於貪俱樂恒有厭逆，阿賴耶識我愛隨縛」者：謂生第四靜慮以上有情，雖於意識中之貪俱樂受恒有厭逆，然阿賴耶識，仍被執爲內我，爲我愛所隨追纏縛，未暫捨離。所以然者，則以第七染污末那，於阿賴耶識，恒起思量而我之也。

「雖於此正法信解無我者厭逆我見，然於藏識，我愛隨縛」者：此有二解：無性釋云：「於此正法中信解無我者，雖恒厭逆分別我見，然有俱生我見隨縛。此於何處（案謂於何處隨縛）？謂彼但於阿賴耶識，率爾聞聲，便執內我驚畏生故。」此約俱生、分別二種我執解。謂信解無我之人，雖極厭逆第六識中分別我執，當厭逆時，我愛暫停。然第六識（或兼第七識）中之俱生我執，能緣第八識，而執爲我也。二、謂信解無我者，雖由意識思擇力故，厭逆我見，然第七識自於第八阿賴耶識我愛隨縛。此約第六，第七識我執有無解。問：若爾，阿羅漢斷除我執，爲是止斷第六識中我執，抑兼斷第七識對第八識所起我執？答：兼斷第七識中我執；以俱生分別二種我執斷已，名阿羅漢，而分別我執唯在第六，俱生我執，亦在第七識中有故。

綜上道理，是故安立阿賴耶識，名爲衆生常所愛、樂、欣、喜之所執藏處，最爲應理，無諸過失，故曰「成就最勝」。

此亦名心。如世尊說：心意識三。

此是第四明此識亦名爲心。分二如前：初、引教，後、釋名。此初。

此阿賴耶識，亦名爲心。此中「心」者，梵云質多，義爲集起，順此方俗，故譯爲心。言集起者，以能積集諸法種子，後時復能生起諸現行法故。

云何知此阿賴耶識亦名爲心？於聖教中，有何證耶？故復說言：「如世尊說：心意識三。」既許意及識二體性有別，故知心體與彼意、識亦有差別。

此中意有二種：第一，與作等無間緣所依止性無間滅識，能與意識作生依止。第二，染污意，與四煩惱共相應，一者薩迦耶見，二者，我慢，三者，我愛，四者無明：此即是識雜染所依。識復由彼第一依生，第二雜染，了別境義故。等無間義故，思量義故，意成二種。

此釋名也。文復分二：初旁釋意，次正釋心。初中又分三：此釋二種意。

「此中意有二種」者：謂此心、意、識三者中之意有二種也。意者思量之義。

「與作等無間緣所依止性無間滅識，能與意識作生依止者」等無間緣乃四緣之一。所謂「緣」者，乃諸法生起之原因及所藉之條件。言四緣者：一、因緣，二、等無間緣，三、所緣緣，四、增上緣。一因緣者，親辦自果之原因。餘三緣則爲所藉之條件也。然此因緣以有爲法（爲者造作，此類法爲衆緣聚集所造作，有彼造作，故名有爲。一切現象，皆此所攝）爲限；以無爲法（不藉因緣造作而湛然常住之法）非緣起法故。諸有爲法雖能辦果，而非親者，亦非因緣。又此能爲因緣之法，有其二類：一、能生現法（名爲現行）之種子，二、能熏阿賴耶識而成種子之現行。阿賴耶識中色、心善惡等種子於衆緣和合時，即能生起各自現行；種子望現行，能親辦果，名爲因緣。色、心、善、惡等各別現行，有強盛勢用者，於生起之剎那，能熏阿賴耶識，生自類種；現行望種，親辦自果，亦名因緣。一切有爲法之生起，皆仗此緣。二、等無間緣者：前聚心心所，望後起同聚心心所，如前聚眼識及彼心所望後聚眼識及彼心所，有閑避其現行位，招引後果令生之作用。前後剎那相連接者，固可令生，縱其後果經時久遠，亦能爲開導，令彼得生。即此前聚心心所法，能

爲後聚心心所法生起之緣。又前滅一心，望後心及心所爲緣，前滅心及心所望後一心，亦同爲緣，開避招引作用齊等，惟須中無間隔，故名等無間緣。若有間隔，即非此緣。心法生起，必藉此緣。色法及非色非心法，則不須此。三、所緣緣者：諸心心所生起時所緣處，所仗托之對境也。即此所緣之對境，望能緣之心、心所法爲緣，故名所緣緣。四、增上緣者：有勝勢用，能於餘法助令生長，或礙不令起，起已壞滅者也。如水土於禾穀爲順增上緣，霜雹於禾穀爲遠增上緣等。一切法生，皆藉此緣。雖前三緣亦此緣攝，然今除彼，別立此緣。所依止性即是意根，此依小乘大毗婆沙及俱舍論等立說，與世親以後唯識諸師所說不同。良由無著論師造此攝論，意在誘導小乘學者，捨小歸大；而小乘師唯以無間滅識（即等無間緣）爲意識生起之所依止，——如俱舍頌云，「由即六識身，無間滅名意，爲第六依故，……」即其一例，——故論師不破其說，而別立染污意，於是意成二種。諸識生起必有所依之根；依小乘說，意識依止此無間滅識爲根而得生起，故無間滅識是意識之所依止性；然非別種所依止性，乃等無間緣所依止性。性者體也。又無間滅識不惟作意識之等無間緣，亦作眼等五識之等無間緣，本論唯就意識立說，故曰：「能與意識作生依止。」案此句陳、隋二譯但云爲識生起所依，不云意識。呂澂從藏本譯此二句云：「由作無間緣而爲依止故，識滅無間名意，爲識生起之所依，」因謂唐譯以意識連綴爲文，似專爲第六識而發者爲誤。今謂譯人推尋作者意思，知此二句專就意識立言，故添文潤色，使意義明瞭耳。且俱舍頌亦明言「爲第六依」矣。且所據傳本不同，不得謂爲譯人之誤或不忠實也。

「第二染於意」者：即第七識，不共小乘，乃論主所欲立也。此意無始時來，「與四煩惱恒共相應」，爲其所染，致成污濁，故名染污。云何爲四煩惱？「一者、薩迦耶見，二者、我慢，三者、我愛，四者、無明」。此中薩迦耶見者：見是堅牢執著之義。薩迦耶梵語。薩是壞義，迦耶身義。五蘊和合所成之身，新陳代謝，非常非實，有壞滅故，名爲壞身。此身本非常存而不可分析之我體，亦非我所領有之工具；衆生於此，由迷謬故，妄執爲我，或爲我所（我之所有）。此種堅執，名爲薩迦耶見，或壞身見，亦名身見，於餘經論復名我見。我慢者：恃我、我所而自高舉。此由薩迦耶見爲先，連帶而有。非先執我，無所恃故。由執

我而起慢，故名我慢。我愛者：愛是貪箸。此亦由薩迦耶見而有。由執我故，復於所執之我，深生愛染，故名我愛。無明者：明是智之異名，無明即是無智。認識謬誤，不明事理，故曰無明；即是愚癡，明智之所對治也。

前三煩惱，皆以無明爲因，若無無明，即不生起我見等故。然第六意識中亦有此四煩惱，稍自省察，即可知；染污意中，此四煩惱恒時現起，作用微細，非靜中冥察，不易知也。

「此即是識雜染所依」者：清淨之反，說爲雜染，即有漏之異稱也。然雜染與染法不同。若但言染，唯局於不善之煩惱。若言雜染，則通有漏善法，及有覆無記法。故雜染寬而染法狹也。依之而成爲雜染故，名爲雜染所依。此染污意，既恒與四煩惱相應，是即前六識生起時，不論在定或不定位，亦不論所起識是善或惡，皆受同時現行之染污意所影響，前六識惡心起，固無論矣；前六善心起時，亦因同時現行之染污意有四煩惱故，不成清淨。故此染污意即是前六識之雜染所依。「識復由彼第一依生，第二雜染」者：無間滅意爲六識生起所依止，名第一意。染污意爲六識雜染所依止，名第二意。前六識復必由彼第一意爲所依止而生，由第二意爲所依止而成雜染。「了別境義故」者：此釋識名。謂由第一依所生，及由第二依而成雜染之識，所以名爲識者，由有了別對境之義故。

「等無間義故，思量義故，意成二種」者：此釋意名。謂由爲後聚識生起所依，有等無間義故，名第一意；染污意恒與四煩惱相應，於所執我不斷思量，由此義故，名第二意。是故「意成二種」。

今人對勘藏本，謂由「識復由彼第一依生」以下「依藏本句讀，蓋依上所引經釋成識之名義也。意云：識者，復由彼第一依生，由第依而成雜染，以了別境義故爲識。此與無性合。」（見藏要第一輯攝大乘論本卷一本句附註。）案藏本文義較顯明，而與世親釋不合。今參究世親無性二釋而爲句讀，並錄二釋於後，讀者觀二釋而會其通，則知世親無性二師之意亦不相違，非必以藏傳本爲最確也。世親釋：「「識復由彼第一依生第二雜集」者：謂無間滅識說名爲意，與將生識容受處所，故作生依。第二染污意爲雜染所依；以於善心中亦執有我故。」「了別境義故，等無間義故，思量義故，意成二種」者：謂於此中由取境義，說名爲識；由

與處義，名第一意；由執我等成雜染義，名第二意。」

無性釋：「「由第一依生」者：由等無間滅意故。「由第二雜染」者：出四煩惱相應意故；以計我等能作雜染。「了別境義故」者：

是能取境，似境現義。此釋識名。「等無間義故，思量義故，意成二種」者：此釋意名。

復次，云何得知有染污意？謂此若無，不共無明則不得有，成過失故。又五同法亦不得有，成過失故。所以者何？以五識身必有眼等俱有依故。又訓釋詞亦不得有，成過失故。又無想定與滅盡定差別無有，成過失故。謂無想定染意所顯，非滅盡定。若不爾者，此二種定應無差別。又無想天一期生中，應無染污，成過失故。於中若無我執我慢。又一切時我執現行現可得故，謂善、不善、無記心中。若不爾者，唯不善心彼相應故，有我。我所煩惱現行，非善無記。是故若立俱有現行，非相應現行，無此過失。

此以正理成立染污意也。此論既爲引小歸大，立二種意。初無間滅意，小乘所許。第二染污意，小乘未許，故須據理成立。蓋若無染意，便有六種過失；若立染意，則無其過，是以須立染意也。文中先以長行述理，次以頌語撮要復敘。茲先解長行。

此段魏譯全缺。今人對勘藏本，謂藏本亦有此段文，唯無「復次」二字而已。

「復次，云何得知有染污意」者：假設問難。

「謂此若無」以下，正述染意成立道理。此染污意若無有者，便有下述六種過失。
「不共無明則不得有成過失故」。此第一失。不共無明者，小乘所共許，障真智生起之愚癡也。謂諸衆生無始以來具有一種特殊無明，有勝勢用，能於一切時及善、惡、無記等一切心中，微細現行，爲真實智生起障礙，令諸衆生長夜昏盲；如是無明所有勝用，非平常與前六種識相應而起之無明所共有，故名不共無明。此不共無明，不應依前六識而起；六識有間斷，此恒相續故。若謂依六識起，六識間斷時，則此無明應亦間

斷，便非不共。又大小乘共許同一識中，染性無明不得與善心所同時現起；不共無明若依六識，則彼六識，性應恒染，即不得有善心生起，更不能修出世聖道。故若無此染污意者，不共無明則不得有，以無所依故，便成過失。是則應許別有染意，恒時相續，爲彼不共無明所依；任彼六識在善、惡或無記位中，不共無明皆可俱時生起，而非與彼六識相應。如是常知，不共無明若有，染污意亦必定有也。

「又五同法亦不得有，成過失故。所以者何？以五識身必有眼等俱有依故。」此第二失。五謂眼等五識，同法謂同法喻，如因明中之同喻然。以前五識爲同法喻名五同法。大小乘諸契經中說；眼色爲緣，生於眼識，乃至意法爲緣，生於意識。五識生起，既各別有其所依根（眼識依眼根，乃至身識依身根），意識生起亦必有其所依之根。而意識所依之意根，在小乘則以無間滅意當之，本論則立染污意爲真正意根（理由詳下）。既五識皆有所依根，意識獨可無根而起，不應道理。是故意識須有意根，與五識之須有五根，爲同法喻。此染污意若是無有，是即意識無所依根，而以五識爲同法喻之理亦不得有矣。所以然者何邪？根與識必同時俱有；如眼識與眼根同時，乃至身識亦與身根同時而有（俱有即是同時之意）。與能依識同時之所依根，名俱有依。第六意識既亦是識，故亦應有俱有所依。無間滅意，既非同時，即非俱有所依，非真意根。身是聚集義。一識名識，聚合多識，則名識身。

「又訓釋詞亦不得有，成過失故」，此第三失。將一名詞而訓釋之，名訓釋詞；猶今人所謂定義或界說也。能思量故，說名爲意，乃大小乘共同之訓釋詞，亦諸契經所說者也。若說無間滅識名爲意者，無間滅意，已謝滅故，無思量用。若謂先時有思量者，未謝滅時，既名爲識，何須別立意名。知別故有此染污意，恒時現起，於所執我，審細思量，始合訓釋詞義。若無此意，則思量義，亦不得有，便成過失。

「又無想定與滅盡定差別無有，成過失故。謂無想定染意所顯，非滅盡定。若不爾者，此二種定應無差別。」此第四失。謂諸凡夫，厭患思想，修習禪定，能令前六識心、心所，不起現行，名無想定。人無想定雖滅六識，而染污意，猶自現行。惟諸聖者，由止息作意，入深禪定，能兼滅染意，名滅盡定。若無此意，則無想定及滅盡定俱滅六識故，應無有差別，與經中所言無想定在凡夫有，滅盡定惟聖人得者相違，便成過

失。然此二定實非無別：謂無想定，染意所顯，非滅盡亦是染意所顯；染意所顯者，謂有染污意現行也。若不許此二定是由染污意之有無而爲分別，則此二定應無差別。爾者如是也。

「又無想天一期生中應無染污，成過失故，於中若依我執我慢。」此第五失。修無想定者，沒後生無想天，除初生時及臨死時有六識及共心所暫現外，中間恒無六識心、心所法現行。然於此期生命中，染污意仍現行不息，我執、我慢恒時隨逐，故爲聖者之所訶厭。若無染污意者，生無想天期中，便無我執、我慢，即應無有染污。如是便成過失。然生無想天有情實有染污，故知必有染污意。今人對勘藏本，謂藏本此句在一期生中句上文義更順。蓋唐譯依梵語語法直翻，故委曲而見真也。

「又一切時我執現行現可得故、謂善、不善無記心中。若不爾者，唯不善心彼相應故，有我、我所煩惱現行，非善無記。是故若立俱有現行，非相應現行，無此過失。」此第六失；顯無染意，一切異生恒時執我便不可得。謂諸異生，一切時中，有我執現行現前可得，不唯在不善心中有之，在善、不善、無記心中並皆有之，諸異生修布施等善行時，亦有我執常所隨逐，自謂我所能修行施等是。我執現行者，由我見種子所起之現行也。此我執相，不應依六識起，因我執是煩惱，且又必依無明始起，六識起善心時，必不生起我執，由善與煩惱必不同時起故。若無染意，則唯不善心生起時，與彼我執相應，故有我及我所煩惱現行，非善、無記心生起時，有此我執現行也。不爾，謂不立染污意也。然若有此染污意，六識雖與善法相應，此意自與煩惱相應，六識善心雖無我執相應現行，而有我執俱有現行，而一切時一切位中我執現行皆現可得之理，乃得而解釋也。此中各別依心俱時現起，名俱有現行；心所與心相應起而，名相應現行。故若立此一切時位現起之我執爲俱有現行，非相應現行，便無過失也。

此中頌曰：

若不共無明，及與五同法，訓詞、二定別，無皆成過失。無想生應無我執轉成過。我執恒隨逐，一切種無有。離染意無有一、三成相違。無此一切處我執不應有。真義心當生，常能爲障礙，俱行一切分 謂

不共無明。

上長行中，既以六理，成立染意；茲欲重顯前義，復撮其要，而說頌文，俾學人反復尋討也。

「若不共無明，及與五同法，訓詞、二定別，無皆成過失」者：謂若上述之不共無明，五同法，訓釋名詞，及無想、滅盡二定之差別，若無染污末那，便與教理相違，斯成過失。此頌重顯長行所述前四過失。

「無想生應無我執轉成過」者：謂若無染污末那，則生無想天之有情，一期生中，應無我執生起，便成過失。「轉」者，生起也。此半頌重顯長行所述第五過失。

「我執恒隨逐一切種無有」者：「一切種」即善、惡、無記三種心也；總括三性，故言「一切」。謂若無有染污末那，則佛經中所言諸有情（除聖者）常有我執隨逐現行於一切種心之義，亦應無有。此句直譯，故文義較澀。且如王恩洋疏，便與下句「離染意」三字連續。然勘呂澂所譯西藏傳本，此句作「與我執相應，是非一切類」斷句，「離染意」三字屬下句，作「無染污意故」云云，則知王疏誤也。此半頌重顯長行所述第六過失。

已上二頌重顯六種過失訖。次下一頌將六種過失歸成三類。

「離染意無有二」者：「二」即不共無明及五相似法。若離染意，便應無有不共無明及五同法。此第一類失。

「三成相違」者：「三」「謂訓釋詞，二定別及無想生中我執恒隨。若離染意，如是三者便與事理相違。此第二類失。

「無此一切處我執不應有」者：「此」指染意。「一切處」謂善、不善及無記心處。若無此染污意，則一切處中恒起我執之事不應有也。此第三類失。

次下一頌別顯不共無明。

「真義」者，諸法之真實義，即是真如。能證真如之智，名真義心；是即次下分所言之根本無分別智也。能證真如之智當可生起之時，此無明常能爲障礙，令不得生。故曰：「真義心當生，常能爲障礙。」又此無

明，在善、不善、無記等一切分位中，常與諸識俱時現行，故復說言：「俱行一切分」。如是無明，謂之不共無明。

此意染污故，有覆無記性，與四煩惱常共相應。如色、無色二纏煩惱，是其有覆無記性攝。色、無色纏為奢摩他所攝藏故。此意一切時微細隨逐故。

此辨染污意是有覆無記性。

又此小段，魏譯闡文。

上來既證染意實有，故復進而辨釋此意在四性中屬何性也。一切法總分四性。性者，就其性質而分類也。一者善性：謂能與無罪可愛果故。二者惡性：謂能招有罪及苦果故。三者有覆無記性：覆是障蔽義；障礙聖道，隱蔽自心，故名有覆；非善不善，故名無記。四者無覆無記：不障聖道，不蔽自心，故名無覆；非善非惡，故名無記。此意於四性中，爲何性攝？由「此意」是「染污故」，應是「有覆無記性」攝。何故此意成染污耶？由此意「與四煩惱常共相應」，能障聖道，令不得生，能蔽真智，令不證真，故成染污。或復疑言：此意既與四煩惱常共相應，云何不是惡性，而是無記耶？爲釋此疑，故先舉喻，次說共因。此中喻者：謂如色、無色二纏煩惱，因爲奢摩他力所攝藏故，行相微細薄弱，體雖是煩惱，然不能引起惡業，轉成爲有覆無記性。「色、無色二纏煩惱」者：謂色、無色二界之煩惱，纏有二義：一者，煩惱之異名。二者，纏報之義，謂生死苦報能纏縛有情，使不自在也。今取後義。故二纏即二界之纏報也。「奢摩他」者，此翻爲止，即定之異稱。次說因者：謂此染污意亦如是，雖一切時有四煩惱隨逐而轉，然此所依之意行相微細，不作惡業，共能依之四煩惱亦不親引惡業，力量微細，隨逐染意而轉。故此染意，是有覆無記性攝。

心體第三，若離阿賴耶識，無別可得。是故成就阿賴耶識以為心體，由此為種子，意及識轉。

此正釋心。復分三：此明心體即是阿賴耶識。心意識三，已知意體即是染污意及無間滅意：識體即前六

識，行相粗顯，無須解釋。意識二名，既各有體，如是此心，亦應別有體。此中「心體第三」乃逆次上數也。然此心體，若離阿賴識，便無別體可得，故即依教及理成立阿賴耶識以爲心體。「種子」者，依世親釋，因也。出此阿賴耶識爲因，意及六識乃得依之而生起。「轉」是生起義。因即所依；阿賴耶識爲意及識根本依故。

何因緣故亦說名心？由種種法薰習種子所積習故。

此釋阿賴耶識名心所由。

心者積集生起之義。阿賴耶識何所積集，亦說名心？「由種種法薰習種子所積集故」，有積集義，故說名心。「種種法薰習種子」者，謂色、心、心所、善、染、無記種種現法薰習於阿賴耶，成爲種子也。此薰習種子即以阿賴耶識爲積集處所。又此「薰習種子」指種種現法薰習於賴耶之習氣，亦即現起爲後生現法之功能，與前「由此爲種子」之種子，義有分別，彼指所依之因言，此指習氣言也。

復次，何故聲聞乘中不說此心名阿賴耶識，名阿陀那識？由此深細境所攝故。所以者何？由諸聲聞不於一切境智處轉，是故於彼，雖離此說，然智得成，解脫成就，故不爲說。若諸菩薩，定於一切境智處轉，是故爲說。若離此智，不易證得一切智智。

此釋聲聞乘中不說此心爲阿賴耶之理。

或作是問：既心體即是阿賴耶，是阿陀那識，何故聲聞乘不說此心名阿賴耶等？由此阿賴耶識等是深細境所攝，非聲聞人之羸劣智慧所能了知故。「此」指阿賴耶識。言「深細」者，其理難窮名深，其相難了名細。「境」謂所知境界。阿賴耶識難窮難了，是深細境界中所攝；彼聲聞人所了知者惟是麤淺境界所攝。無性釋云：「言麤淺者，謂諸色法，體相麤故；受等諸法，所緣、行相易可分別，行相粗故與此相違，如其所應，賴耶識說名深細。」「由諸聲聞不於一所知境界，切境智處轉」者，一切所知境界，名一切境。其智能知一切無一法不知不違，名一切境智。一切境智即是所希求處，故曰一切境智處。「轉」字意謂正勤修行希求

證得也。「是故於彼，雖離此說，然智得成，解脫成就，故不爲說」者：謂諸聲聞人，但求自利，彼由麤淺色等境界，苦、集等性，無常等行，正觀察時，便能永斷一切煩惱，是故於彼聲聞，雖離此阿賴耶識之說，然彼自乘智亦得成，成就解脫，故佛世尊不爲彼等宣說阿賴耶識之教。

「若諸菩薩定於一切境智處轉，是故爲說」者：謂諸菩薩，不惟希求自利，兼以利樂一切有情爲希願故，定須正勤修行，求證一切境智，是故世尊爲彼等說阿賴耶識。問：諸菩薩等，何故定於一切境智處轉，始能作利樂有情事耶？答：如無性云：「若無一切智，無有堪能隨順知他意樂、隨眠、界根勝劣，有能無能、時分差別，具作一切他之義利。」

「若離此智，不易證得一切智智」者：由解「此智」二字不同此句有二釋。一、依無性釋「此智」謂了達阿賴耶識之智。無性云：「若離阿賴耶識智，不能永斷於義（按：義者境也，本段下文同。）偏計。彼不斷故，無分別智則不得有；執有偏計所執義故。由此因緣，不易證得一切智智。所以者何？有分別智知偏計義自相分別展轉不同，以無邊故，決定無能具證一切。若知此唯阿賴耶識能生習氣轉變力故，義及有情顯現而轉，爾時覺知無所取義（按謂覺知無所取之境），如是亦能知無能取（按謂無能取之識），由此證得無分別智。次後得智，如所串習，通達法性，由一切法共相所顯真如一味，知一切法，於一剎那亦易證得一切境智；非無邊故」。二、今世解家或謂「此智」指一切境智；意謂若離此一切境智，即不易證得一切智智也。今謂前說爲是。何以故？無性論師去無著世親不遠，學有所本，較現代人爲可信故。又依無性釋意，一切境智即是一切智智，（如前云「由此因緣不易證得一切智智」，後云「於一剎那亦易證得一切境智」，二智所指是一）；後說將二智分而爲二，於理無據故（能知一切境，名一切境智，即他處所云一切種智；此亦名一切智智，則以此智惟佛有之，於法義無不了達，乃智中之智故。）

復次，聲聞乘中亦以異門密意已說阿賴耶識。如彼增壹阿笈摩說；世間衆生愛阿賴耶、樂阿賴耶，欣阿賴耶，烹阿賴耶。為斷如是阿賴耶故，說正法時，恭敬攝耳，住求解心，法

隨法行。如求出世，如是甚奇希有正法出現世間。於聲聞乘如來出現四德經中，由此異門密意，已顯阿賴耶識。於大眾部阿笈摩中，亦以異門密意，說此名根本識，如樹依根。化地部中，亦以異門密意，說此名窮生死蘊。有處有時見色心斷，非阿賴耶識中彼種有斷。

此是第五明聲聞乘中亦以異門密意說有此識。

阿賴耶識之教，雖非大小乘之共說，然聲聞乘中亦往往以異門密意說此阿賴耶識。

「異門」者：種種不同，說名爲；由此能入，說名爲門。從各方面觀察，而有種種異名，故說爲異門也。

「密意」者：意有隱覆，非極顯了，故名密意。王恩洋云：「何故不彰明顯說，而密意說耶？我於凡愚不開演，恐彼分別執爲我故。既非彼所求，說之又有過，而爲建立根本法體，又不能不說，則以微言密著其義而已。」論中舉三例證之。

「如彼增一阿笈摩」者：依無性釋及成唯識論說，此即說一切有部所傳增一阿笈摩，餘部所傳，無此諸句，今漢譯增一阿含經亦無此文也。「愛阿賴耶，樂阿賴耶，欣阿賴耶，喜阿賴耶」者：此有二解：一云：「愛阿賴耶」是總標句，餘樂、欣、喜三句約現在、過去、未來三世別釋。愛是貪箸。食箸現在名樂，貪箸過去名欣，貪箸未來名喜。依論主意：樂阿賴耶者，樂現在世阿賴耶識；欣阿賴耶者，欣過去世已生阿賴耶識，喜阿賴耶者，喜未來世當生阿賴耶識：要皆密意說有阿賴耶識也。二云：於現在愛阿賴耶，於過去樂阿賴耶；由先世樂阿賴耶故，於未來世喜可賴耶。世親釋並存二解，而以初解爲正；無性釋則惟取初解也。世間衆生由愛箸阿賴耶故，流轉世間，不得解脫。爲求出離，必須斷彼。「爲斷如是賴耶故，說正法時，恭敬攝耳，住求解心，法隨法行。」此中「說正法時」，謂佛說正教法之時。「攝耳」者：謂攝持耳根，專注而聽。「法隨法行」者：世親釋云：「如教寺故」。謂如世尊所教而修證也。然如教而行何以說爲法隨法行耶？依法蘊、發智、婆沙等論，此有三解：一者，所求證之涅槃名法；由此能證涅槃之八支聖道名隨法，以隨順彼法故。爲求涅槃，修行聖道，名法隨法行。二者，別解脫名法：別解脫律儀名隨法；於此中行，名法隨法行。

三者，身律儀，語律儀，命清淨名法；受持此持，名隨法；於此中行，名法隨法行。無性釋亦有二解：一者，所證者名法，由此能證之道名隨法。二者，出世道名法，世間道名隨法。瑜伽師地論三十八更有廣釋。已上諸解，學者應善爲抉擇也。又依無性釋，「恭敬攝耳」是說聞所成智，「住求解心」是法思所成智，「法隨法行」是說修所成智。「如來出世，如是甚奇希有正法出現世間」者：謂佛出世，然後世間有此甚奇而希有之正法教出現。「正法」指佛法也。「於聲聞乘如來出現四德經中，由此異門密意已顯阿賴耶識」者：曾一阿笈摩乃全部之總名，如來出現四德經則增一阿笈摩中之一經，其經說如來出世有四種可稱讚德。前舉總名，後復舉此經名者，緣四阿笈摩皆是多經合成之經集也。已上舉增一阿笈摩之異門密意說。

「於大衆部阿笈摩中」者：謂於大衆部所傳之阿笈摩中，餘部所傳無此文也。「亦以異門密意此名根本識，如樹依根」者：謂於眼識乃至意識六粗顯識之外，說別有深細識，爲餘一切識生起之因，名根本識；譬如樹根，爲莖葉等生起所依之因。論主以爲此根本識即是密指阿賴耶識；以阿賴耶識是餘識總因故。已上與大衆部所傳阿笈摩之異門密意說。

「化地部中，亦以異門密意說此名窮生死蘊」者：佛滅後第三百年間，由說一切有部分出一部，名化地部，舊譯或從音翻爲彌沙塞部，陳真諦，三藏則從義翻爲正地部；今玄奘三藏審正名義，應翻爲化地部。依無性釋，此部立三種蘊：一者，一念頃蘊；謂一剎那有生滅法，即現行五蘊也。二者，一期生蘊，謂在一期有情由生至死一期中暫存不滅者，是即能感此期果報之業力，興此期果報共存亡者也。三者，窮生死蘊，謂從無終以來，相續隨轉，直至得金剛喻定（定名），了決生死，始能斷滅，窮貫生死邊際者也。依論主意，此化地部師建立窮生死蘊，唯是阿賴耶識之異門密意說耳。「有處有時見色、心斷，非阿耶識中彼種有斷」者：謂無色界處，見諸色斷；生無想天及人無想定、滅盡定時，見餘諸心、心所法斷，非色心種子有斷。何以故？以阿賴耶識中所藏「色心種子後時還能生起色、心現法故。是知唯阿賴耶識能窮生死際，而彼窮生死蘊離阿賴耶無別體也。」

所知依分第二

前分既總標綱，以下十分別明十義。此分專明所知依，排次第二，故名「所知依分第二」。「所知依」名，如前已釋。文分四章：甲、安立阿賴耶識異門，（由此能人，名之爲門。異門者，謂從各方面觀察，而有種種異名也）。乙、安立阿賴耶識之相。丙、以正理證有此識。丁、說此識所有差別義。

甲・安立阿賴耶識異門

子・引教釋阿賴耶識異名

此中最初且說所知依即阿賴耶識。世尊何處說阿賴耶識名阿賴耶識？謂薄伽梵於阿毘達磨大乘經伽他中說：

無始時來界，一切法等依。由此有諸趣，及涅槃證得。

此節可分八段：一、證阿賴耶識是所知依。二、證所知依名阿賴耶識。三、明此識亦名阿陀那識。四、明此識亦名爲心。五、明聲聞乘中亦以異門密意說有此識。六、結阿賴耶成大王路。七、釋疑難。此即初也。

「此中最初且說所知即阿賴耶識」者：謂且先說所知依之體即是今茲所言之阿賴耶識。今世解家多從「依」字斷讀，謂此句爲引起全分之語。今謂不然，此句第是引起本節之語，「即」作「即是」解。觀呂徵所譯此論西藏傳本此句作「此中最初且說藏識爲所知依」可知。梵阿賴耶，此翻名藏。藏有三義，如下廣釋。

「世尊何處說阿賴耶識名阿賴耶識」者：以問徵起。王恩洋云：「上「阿賴耶識」問所知依體，下「阿賴耶識」責其名也」。謂世尊於何經中將此阿賴耶識（所知依）說名爲阿賴耶識乎？

「謂」字以下，答也。前云「世尊」，此云薄伽梵，梵文一字，譯師喜用四言文句，曲就軌式，故前後互殊耳。梵語「伽他」，此翻爲頌。頌者美也。謂以美麗韻語，顯示諸法，故名伽他。舊譯云偈，答其尾音也。

「無始」二字以下四句乃阿毘達磨經中語說。

「無始時來界一切法等依」者：無始相續，不可說有初際，故名「無始」。「界」者，因也。「一切法」若依文訓釋，應包雜染及清淨法。然揆論主之意，「一切法」確指雜染法，不指清淨法。世親於此雖無解釋，惟無性謂「……一切法，此唯雜染，非是清淨；故後當言「多聞熏習所依非阿賴耶識所攝，如阿賴耶識成種子，似法似義所起……」等。故一切法，惟指雜染。王恩洋釋以「一切法」爲心心所等染淨諸法者，係依成唯識論阿賴耶識能執持雜染種子及無漏種子之意爲釋，以之說唯識則可，以解此論則誤矣。「等」者，舊作平等解；謂爲一切法平等所依故。然魏、陳二譯皆無此字。今人勘藏本及梵本安慧三十唯識釋論引文亦無此字。故呂澂謂：「等」是數，非謂平等，舊解穿鑿。「依」謂所依止。然解此二句，世親、無性二釋不同。世親云：「界者謂因，是一切法等所依止，現見世間於金鑽等說界名故。由此是因故，一切法等所依止。因體即是所依止義」。世親既以因體（界）即是所依，是許此因體（界）即是阿賴耶識。依此，意謂此無始時來相續不斷之因體，是一切法等之所依止也。無性則云：「界者因也，即種子也。是誰因種？謂一切法」。又云：「所依者，能任持故，非因性故。任持義是所依義，非因性義。所依能依性各異故。若不爾者，「界」聲已了，無假「依言」。是無性之所謂「界」，（因體）者，乃阿賴耶識中種子，非即賴耶；所謂「依」者，乃目能任持種子之阿賴耶識。依此，意謂阿賴耶識爲無始時來，一切種子（因）之任持者（所依）也。二釋雖有不同，世親親承無箸，造此論釋，最得無箸真意；無性所言，自是別解。

「由此有諸趣，及涅槃證得」者：「此」謂一切法等所依，即阿賴耶識。「趣」謂所往，即異熟果。由諸有情作種種業，感得異熟，如有所向往，故名爲「趣」。諸有情等所作之業，性質分量各有不同，所感異熟果亦有異，故曰「諸趣」，是即人、天、地獄、餓鬼、畜生等趣也。由諸有情，各有此識任持諸種子故，隨緣造善不善等業，感得異熟，復藉此識變似根身及器世界，始有諸趣。

識，便無諸趣，即無所謂宇宙、人生。諸趣因果畢竟止息，圓滿寂滅，名爲涅槃。由有阿賴耶識任持雜染法種子故，乃有諸趣；有諸趣故，有諸苦惱，厭逆苦惱，修習聖道，故證涅槃。「涅槃證得」謂之涅槃證

得，依主釋也。

即於此中復說頌言！

「由攝藏諸法，一切種子識，故名阿賴耶，勝者我開示」。

此是第二證所知依體名阿賴耶識。分一小段：初引教，後釋名。此初引教。

「由攝藏諸法一切種子識」者：諸法以此識爲依處，爲此識所攝所藏，猶如府庫攝藏種種珍寶物故。諸法無量，此識如何能攝藏耶？由此識能受諸法熏習，攝持含藏諸法飛氣，（習氣即是種子異名）諸法生起時，熏其習氣於此識中，習氣相續依住，爲後時生起諸法種子，遇緣還復顯現而爲諸法。故攝藏者，攝藏其種子也。是故此識可名一切種子識。此句意謂此一切種子識能攝藏諸法也。

「故名阿賴耶」者；「阿賴耶」此譯云藏，具能藏、所藏、執藏三義，如後當說。由此識能攝藏諸法，故得阿賴耶名也。

「勝者我開示」者：諸大菩薩，堪能了達甚深道理，異諸愚劣，名爲「勝者」。「我」乃說頌者自謂。說頌者或即世尊，或在世尊前受世尊印可而說法之大菩薩也。謂關於阿賴耶識之道理我惟爲彼諸大菩薩開示，不爲愚劣有情而說。此順梵文原式。若順此土普通文勢，應云「我開示勝者」，呂澂所譯西藏傳本即作此也。如是且引阿笈摩證。復何緣故此識說名阿賴耶識？一切有生雜染品法於此攝藏爲果性故，又即此識於彼攝藏爲因性故，是故說名阿賴耶識。或諸有情攝藏此識爲自我故，是故說名阿賴耶識。

此釋名也。

梵語「阿笈摩」，此翻爲教，謂是佛所說之言教；亦名爲傳，師弟授受，展轉傳來故。此句意謂所知之依名阿賴耶，如上所引阿笈摩可爲證也。既有教證，且應解釋阿賴耶識得名所由，故設問言：「復何緣故此識說名阿賴耶識」？

「一切有生」者：謂一切依因緣和合而得生起之法，是即一切有爲法也。無爲法不由因緣聚合而生，故非有生。有爲法中，有雜染法及清淨法二種品類。此指有爲法中之雜染品類，故言「一切有生雜染品法」。「於此攝藏」者：謂依住於此識中，爲此識所攝藏；故此習氣以彼雜染品法爲因，即是彼雜染品法之果體。是故說言：「一切有生雜染品法於此攝藏爲果性」。其實爲果性者，惟是藏於識中之習氣，非即此識也。

「性」者體義。「又即此識於彼攝藏爲因性」者：謂此阿賴耶識，既攝藏彼雜染品法種子，（即習氣）；如是種子即是生起現法之功能，因緣具足即顯現而爲現法；故此現法亦得說爲阿賴耶識之所攝藏。現法生起既以此識所藏種子爲因，故說此識於彼所攝藏之雜染品法爲因體，其實爲因體者惟是此識所藏之種子，非即此識也。

「此識能攝藏諸雜染品法之果性及因性故，「是故說名阿賴耶識」。

「或諸有情攝藏此識爲自我故」者：梵語薩陲，此言有情，情者愛也，有愛生故；舊譯爲衆生；猶今之動物。然植物亦有生，故衆生之名，不善譯也。此中「攝藏」二字，世親、無性皆云是執取義。蓋阿賴耶識一類恒時相續無間，七識依彼而得生起，復緣於彼，執取以爲自我。是由攝藏原義引申而爲執取之義也。

由此執藏義故，「是故說名阿賴耶識」。

復次，此識亦名阿陀那識。此中阿笈摩者，如解深密經說：

「阿陀那識甚深細，一切種子如瀑流，我於凡愚不開演，恐彼分別執爲我。」

此是第三明此識亦名阿陀那。分二如前：初引教，後釋名。此初。

梵云「阿陀那」，此云執持。下文自釋。引解深密經以爲教證。「此中阿笈摩者」，猶云此中教證者也。所引頌文見經中心意識相品，（唐玄奘譯卷第四）。此經云：「廣慧當知，於六趣生死彼彼有情，墮彼彼有情衆中，或在卵生，或在胎生，或在滋生，或在化生身分生起，於中最初一切種子心識成熟，展轉和合，增長廣大，依二執受。（按以上言一切種子識成熟牽生有起，住竭羅籃，展轉和合胎分增長，依二執受）。二者，

有色諸根及所依執受，二者，相、名、分別、言說戲論習氣執受。有色界中具二執受，無色界中不具二種按山「一者」至此，明此識有二種執持）。廣慧，此識亦名阿陀那識。何以故？由此識於身隨逐執持故。亦名阿賴耶識。何以故？由此識於身攝受隱藏同安危義故。亦名爲心。何以故？由此識，色、聲、香、味、觸等積集滋長故。廣慧，阿陀那識爲依止，爲建立故，六識身轉，謂眼識、耳、鼻、舌、身、意識。此中有識眼及色爲緣，生眼識；與眼識俱隨行，同時，同境，有分別意識轉。有識世親謂「於此轉故，名爲攝藏」，三本舊釋攝藏二字並作依住也。諸有生雜染品法於生起時，熏其習氣於此識中；此識攝藏彼法習氣耳、鼻、舌、身及聲、香、味、觸爲緣，生耳、鼻、舌、身藏；與耳、鼻、舌、身、識俱隨行，同時，同境，有分別意識轉。廣慧，若於爾時一眼識轉，即於此時唯有一分別意識與眼識同所行轉。若於爾時二、三、四、五諸識身轉，即於此時唯有一分別意識與五識身同所行轉。廣慧，譬如大暴冰流，若有一浪生緣現前。唯一浪轉；若二，若多浪生緣現前，有多浪轉，然此暴水，百類恒流，無斷無盡。又如善淨鏡面，若有一影生緣現前。唯一影起；若二，若多影生緣現前，有多影起；非此鏡面轉變爲影，亦無受用滅盡可得。如是廣慧，由似暴流阿陀那識爲依止爲建立故，若於爾時有一眼識生緣現前，即於此時一眼識轉；若於爾時乃至五識身生緣現前，即於此時五識身轉。廣慧，如是菩薩雖由法住智（按法住智者，謂對於佛所施設安立之教法能正確了解之智）爲依止，爲建立故，於心、意、識秘密善巧。然諸如來不齊於此施設彼爲於心、意、識一切秘密善巧菩薩。廣慧，若諸菩薩於內各別如實不見阿陀那，不見阿陀那識，不見阿賴耶，不見阿賴耶識；不見積集，不見心；不見眼、色及眼識；不見耳、聲及耳識；不見鼻、香及鼻識；不見舌、味及舌識；不見身、觸及身識；不見意、法及意識。是名勝義善巧菩薩。廣慧，齊此名爲於心、意、識一切秘密善巧菩薩」。爾時世尊欲重宣此識，而說頌曰：「阿陀那識甚深細，一切種子如暴流。我於凡愚不開演，恐彼分別執爲我。」故此頌文乃重頌前義者也。「甚深細」者：「甚」字貫「深」字及「細」字。世間聰慧之人難窮其底，故言「甚深」。聲聞聖人難了其相，故言「甚細」。「一切種子如瀑流」者：此識所持一切種子，剎那展轉相續不斷，猶如瀑水，恒流不息；遇緣便起現行，如水起波；現行復

熏此識而成種子，能爲後時再起現行之因，猶如前波起已還沒水中，能爲後波生起因也。

「我於凡愚不開演」者：「凡」謂世間，「愚」謂聲聞。「恐彼分別執爲我」者：此識從無始以來，乃至窮澈生死邊際，雖復轉變不息，而恒無間斷，凡愚之人，對之易起分別，執以爲我。

我者，世人所謂恒常不變之主人翁也。

何緣此識亦復說阿名陀那識？執受一切有色根故，一切自體取所依故。所以者何？有色諸根由此執受無有失壞，盡壽隨轉。又於相續正結生時，取彼生故，執受自體。是故此識亦復說名阿陀那識。

此釋名也。

此識既名阿賴耶識，以何緣由又名之爲阿陀那識耶？其緣由有二：一者，由此識能「執受一切有色根故」，二、由此識爲「一切自體取所依故」。

「執受一切有色根故」者：唯識述記二云：「執者，是攝義，持義；受是領義，覺義。攝爲自體，持令不壞，安危共同而領受之，能生覺受，名爲執受」。呂澂所譯西藏傳本此「執受」字作「執持」，與下一「執受」字別。「執持」義寬，「執受」義狹，言「執受」必有「執持」義，言「執持」則不包「執受」。學者當細味義理，不可執滯名言也。眼等五根，名「有色根」。「有色」二字有三種解：一云：「色」者變礙之義，有變礙故，名爲「有色」。據此，則眼等根，有變礙故，名「有色根」也。二云：色者，謂能示現在彼在此，（彼此指處所言）凡物可言在彼處此處者，名爲有色。據此，則眼等根，可說在此在彼，如言此處有眼，彼處有耳等，故名「有色根」也。三云：體是色者，名爲「有色」；諸色（除無表色）有色之自體故，名爲「有色」。據此，則眼等根，自體足色，故名「有色根」也。由此識執受一切有色根，安危共同，令盡壽命而不失壞，若至死時，此識捨離，諸根便壞；是以執受義得名阿陀那也。

「一切自體取所依故」者：「自體」意即自己身體。「取」謂執取，義即執受。（觀上下文可知。有謂不然者，執泥文字也）。此識執持攝取有根身及諸種子，以爲自體。取彼自體，自體之取，名「自體取」。所以說此識能執受一切「有色根」者何耶？答：「有色諸根由此執受，無有失壞，盡壽隨轉」故。此句大意，如前已釋。

所以說此識爲一切自體取所依者何耶？答：「於相續正結生時，取彼生故，執受自體」。「相續」者，有情之異名，亦即身體之異名；心識相續，生命不斷故。結合而生，名爲「結生」；此識執受父母精卵，與彼結合，由是一期自體得生起故。此識正與精卵結合而生起身體之時，」名「相續正結生時」。「取彼生」者：「彼」指相續。彼相續生起，名爲「彼生」；彼之生故。今人或以「彼」爲形容詞，爲「彼生」猶如彼人者，非也。（呂澂譯西藏傳本此句作「執彼現成故」。附註云：「彼字意指相續。唐譯作彼生，則與上結生之生相混」。）執受彼體，今彼生起，名「取彼生」。由能取彼生故，執受一期自體令不斷滅。

由此二義，是故此阿賴耶識亦復說名阿陀那識。

（篇者後記：羅時憲先生的《攝大乘論疏》，乃於民國三十六年圓音月刊輯出，原文分六期刊登，而此處缺第二次。）

佛曆二五四零年（公元一九九六年）十二月版

法相學會集刊

第四期

—— 羅時憲先生紀念專輯

編輯者： 法相集刊編輯委員會

出版者： 香港佛教法相學會

香港九龍窩打老道
一零八號B座二樓

承印者： 偉生印刷公司

香港柴灣豐業街二號
楊耀松第七工業大廈
十一字樓C座

電話：二五五七三〇〇六
傳真：二五五七二九六〇

版權所有・請勿翻印

定價： 港幣壹佰五十元正

THE DHARMAKSHANA BUDDHIST INSTITUTE

BUDDHIST JOURNAL

VOL. IV DECEMBER , 1996

Table of contents

1. An explaination of Hastavāla-prakaraṇavṛitti by Lo Shi-hin
2. An explaination of Mahayana-saṃgraha-śāstra by Lo Shi-hin
3. A Study on Abhisamayālaṅkāra-śāstra by Chan Man-lan
4. A Study of the Mahāyāna Sūtras on Nirvāṇa by Koh Cheng-hua
5. A Study of the Thought of Paramartha through his
Translation of Mahayana-saṃgraha-śāstra by Sik Wai-yui
6. A study on the Theory of Bijas of the Vijñāptimātrata
School. by Lee Yun-sang
7. A Critique on Dharmakirti's Classification of Negative
Judgments by Chan Sam-tin
8. The Comparison of Two Popular Editions in "The Sutra
of Hui Neng" by Ko Wing-siu
9. The History of "The Sutra of Hui Neng" in English
Versions Translations by Ko Ping-yip

Published by
The Dharmalakshana Buddhist Institute
108, Waterloo Road, 2nd Floor, Flat B, Kowloon.
Hong Kong